

La Bandiera en pèsc e en vera



Bandiera de onor de la Comunità de Fiem ai tempes de la Veres de liberazion (1798), con sbaibl e tamburin: conzeduda "per segnalai dei Fiemazzi il gran valore"; disc la scritta sot ite.

"Nosce bandiere sgola con fasce de più color cheste soule noi vardon de bon eie e bel amor"

Coscita dijea chela cianzon veiora che recordèa i Arimans, i verieres defensoras de Fascia contra i Trujegn invasores: "Vivat i Latrons! / Vivat Fassa". De chest aon jà rejonà su la Usc (n. 36, 2009) ma se zachei volessa se lejer fora dut l test i pel l troèr te "Mondo Ladino" (1995: 300). Donca someassa dalvera che la bandieres de la Regoles sie zeche che à reijes fones ti "prumes tempes" de noscia comunanza, n temp che perauter partegn più a la dimenscion epica, o mitologica, che no a la storia.

Dai documenc, defat, no saon se i miliziosc fascegn che del '600 vegnia metui a la leta da la Comunanza per contribuir a la defendura del Tirol (aldò del *Landlibell*, 1511), estra che langhieres, sàbies, spontons e vèlch moschet, se portèa dò enche bandieres de vèlch sòrt: saon enzeve che del 1624 flautist (*pfeiffer*) l'era Batista De Luca, e Antoni de Soraruf fajea da tamburin (*trambtschlager*) (A. Mura, te "Mondo ladino" 2014: 81-123). Se i aea na bandiera, i n'aea una e una demò: duta l'altres, cheles de la Regoles, les restèa pa ben a cèsa.

Temp de vera, a cef de la compagnia di miliziosc, o Scizeres, jia donca la

bandiera, con apede jù sbaibl e tamburin a segnèr l pas, desche te Fiem (v. dessegn 1). Saon con segurezza che chest tant é sozedù enche per la Compagnia de Fascia, da la "Veres de liberazion" contra l'armèdes de Napoleon (1796-1809), canche nesc Scizeres à portà sia bandiera, da enlouta en ca dita apontin "Andreas Hofer Fahne": chesta fossa stat la

"bandiera de la Comunità" (*Generalgemeinde Fahne*), la medema che ades – de grazia a Otto Weiss e sia fies – é conservèda tel Museo Ladin (v. dessegn 2). Ence de chest aon jà rejonà assà su la Usc (n. 36, 2009), recordan enche l document del 1893 che reporta chesta memoria storica.

Donca la bandieres de la Regoles (o "di fenc", che volèssade dir) fazile



Bandiera de Andreas Hofer, tel dessegn de Franzeleto (1910). La scritta disc che l'era la veia bandiera de Vich, ma ades "la vèl desche bandiera del Comun General de Fascia".



Pera 1889: i Scizeres de Fascia en ocazion de na egercitazion de tiro al tulac: se veit bel sul secondo palancil la "sagomes" biances e neigres coi bujes de la bales de chi che aea trefà...

vegna rencurèdes dai conscric del paisc e tirèdes fora su la nozes, festes e carnascèr per l'usanza veiora de "menèr la bandiera", e les à seghità a aer chesta funzion e foja (teila grana, mènec curt e contrapeis) fin te nesc tempes. Alincontra, podon pissèr che chela che jia co la milizia ciapèa n mènec adatà a jir en "marcia e parèda": chest mènec più lonch sarà pa l medemo che se veit amò sui veies retrac de acà i cent egn.

Defat, dò Napoleon e la Restaurazion (1815) la milizies teritoriales é states adertura toutes jù, e via per l'Otcent a sie post é vegnù metù sù la "coscrizion obligatoria": nesc fenc cognea jir coi sudé (magari per balotaje) te l'armèda imperiala, la maor pèrt coi *Landeschützen* o coi *Kaiserjäger*. L'é restà i "Scizeres" (per talian "Bersaglieri", chi che trajea al tulac, tel Stònt), doventé na sociazion para-militèra olache jia ite enche chi che aea fat l servije de leva o enche tout pèrt a vèlch campagna de vera, desche contra l'Etèlia del 1866: i "Feteraneres", donca, enche chisc fornii de sia bandiera.

Descheche aon dit, chesta situazion se la veit fora bel ti retrac de la fin de l'Otcent, olache vedon da spes bandieres de soi sòrts. Per poder schiarir miec la cossa, che no vegne fat confuzion, n porton dant amò does.

Bandieres da parèda l'é cheles che se veit encrojèdes tel bel mez del retrat n. 3: l'é apontin chela biencia e verda di Feteraneres e chela de Andreas Hofer (o del Comun General), fazile enlouta rencurèda en memoria de la veres de liberazion da la Sozietà del

"Bersaglio Distrettuale" de Fascia, che l'era a Poza, olache ades l'é la scuola populèra. Foja e mènec desferenc moscia enzeve la doi bandieres lochèdes da les pèrts: l'é la bandieres de la doi Regoles, a cencia chela de Poza, a dreta de Pera, granaces, con mènec più curt e Bandierèl regolà a l'antica (zaolà l'é pa ben enche l Sotecouda...).

Medemo tel retrat n. 4, tout jù a Soraga del 1899. La bandiera de la Regola la é su la dreta: fazile l'é apontin chela che (malmetuda, ma restaurèda) ades fèsc bela parbuda te sala de "La Gran Ciasa". Su la cencia enzeve se spia endò chela di Feteraneres, con so bel mènec da parèda. L'é chesta la bandiera che en chela di vegn benedida, no segur chela de la Regola.

Te chela vedrina ja Soraga l'é fora enche na fascia (*Fahnenstreife*) con su scrit "Comune di Soraga – Guerra 1866": chesta fascia no à nia a che fèr co la bandiera de la Regola, ma ben con chela di Feteraneres. Enche percheche de l'Otcent, en vera, i sudé da Soraga i jia spartii fora ti desferenc reparc melitères austriaches, e alò segur no i podesa se tor dò la bandiera del paisc...

En concluzion: l'é ben bel che te Fascia vegne "recuperà" o enche metù da nef en दौरa la veia bandieres, ma ge volessa ampò che (apede ai colores, che ampò no aea negun valor "araldich", descheche ne recorda p. Frumenzio) vegne tegnù sù enche la memoria del segnificat che les à abù te la storia e de sia dreta funzion.

Fabio Chiocchetti



Soraga 1899: festa per la benediscion de la Bandiera di Feteraneres de Soraga, stac coi sudé sot l'Austria.